

調御天人師 割我恩愛縷 損絕諸疑網
瞋癡遂乃拍 四眾稽首慶 解謝大神仙
今日蒙開度 願卒大慈憐
元陽真人及諸時眾說偈都畢一時恭敬作
禮而去

第九

十八

太上靈寶元陽妙經卷之九

太上靈寶元陽妙經卷之十

阜

昇大羅品

如是我聞一時

天尊在蒲林國中焚華樹下元陽宮中與大
聖真人大仙道士男女官等百萬人俱前後
圍繞爾時天尊剋以七月七日昇於大羅上
宮思惟入定見威神力放大光明雜色青黃
赤白遍照三千大千世界及至十方虛空邊
際亦復如是其中所有六趣眾生遇斯光者
四垢煩惱一切消除是諸眾生見聞是已心
大憂惱同時舉聲涕泣自相謂言且各裁抑
莫大愁苦當共疾往詣元陽宮中至天尊所
頭面著地頂禮勸請天尊莫向大羅住此元
陽或百年或千載互相執手復作是言世間
空虛眾生福盡不善諸業增長我等今當速
往天尊不入即去又作是言世間虛空我等
從今无有救護无所宗仰貧窮孤露一旦遠
離无上天尊設有疑惑當復問誰時有力量
諸大聖眾真人大仙道士男女官等及諸清
信士清信女遇見天尊光者其身顛掉乃至

大動不能自持心昏迷悶恍惚无寧爾時復
有松靈真人光妙真人鬱羅真人等百千萬
人心得自在所作已辦離諸煩惱調伏諸根
如大龍王有大威德成就空慧速得已利如
栴檀林栴檀圍遶如師子王師子圍遶成就
如是无量功德一切皆是天尊弟子各於晨
朝日出時離常住處手執香鑪過天尊光
明更相謂言我等宜速澡漱清淨作是言已
舉身毛豎不能自持涕泣盈目生大苦惱為
欲利益安樂眾生成就大乘第一空行顯發
大道方便密教為不斷絕種種說法為諸眾
生調伏因緣故疾至天尊所稽首尊足圍繞
百市稽首恭敬却坐一面爾時復有道士男
官女官男職女職二十四職將領徒眾百千
萬人等諸漏已盡心得自在所作已辦離諸
煩惱調伏諸根如大龍王有大威德成就空
慧亦於晨朝日出時舉身毛豎涕泣盈目
生大苦惱亦欲利益安樂眾生成就大乘第
一空行顯發大道方便密教為不斷絕種種
說法為諸眾生成調伏因緣故疾至天尊所稽首

尊是繞百千市稽首恭敬却坐一面人中之龍位階十地安住不動方便現身其名曰大王納善真人決理真人最勝真人妙思具人大慧真人而為上首其心皆悉敬重大乘安住大乘深解大乘愛樂大乘守護大乘善能隨順一切世間作是誓言諸未度者當令得度已於過世無數劫中修持淨戒善持所行解未解者紹三寶種使不斷絕於未來世當轉法輪以大莊嚴而自莊嚴成就如是元量功德等觀衆生如視一子亦於晨朝日初出時遇天尊光時舉身毛豎涕泣盈目生大苦惱亦為利益安樂衆生成就大乘第一空行顯發大道方便密教為不斷絕種種說法為諸衆生調伏因緣故疾至尊所稽首尊足繞百千市稽首恭敬却坐一面爾時復有元量清信士女受持五戒威儀具足其名曰威德千古遠遊童叟成許飛瓊宛陵華等而為上首深樂觀察諸對治門所謂善樂常淨我无我實不實歸依非歸依衆生非衆生恒非恒安非安為無為斷不斷常不常如是觀察等

法對治之門亦欲樂聞无上大乘如所聞己能為他說善持淨戒渴仰大乘既自充足復能充足餘渴仰者善能攝取无上智慧愛樂大乘守護大乘善能隨順一切世間度未度者解未解者紹三寶種使不斷絕於未來世當轉法輪以大莊嚴而自莊嚴心常染味清淨戒行悉能成就如是功德於諸衆生大慈悲平等无二如視一子亦於晨朝日初出時為欲莊嚴道教人人各取香木萬束稱檀沉水牛頭栴檀天木香等是一一木文理及附皆有七寶微妙光明譬如種種雜絲畫飾以道力故有是妙色青黃赤白為諸衆生之所樂見諸木皆以種種香塗鬱金沉水反膠香等以諸華而為莊嚴衆寶蓮華諸香水上懸五色幡柔軟微妙猶如天衣繡縠繒錦綺是諸香木載以寶車是諸寶車出種種光青黃赤白輻輳皆以七寶廁填是一一車駕以駟馬是一一馬駸疾如風一一車前建立五十七寶妙幢真金羅網彌覆其上一一寶車復有五十微妙寶蓋一一車上乘諸華等

青蓮華白蓮華紅蓮華金蓮華紺蓮華共華純以真金為葉金剛為臺是華臺中多有黑蜂遊集其中歡娛受樂又出妙音所謂無常苦空無我是音聲中說真人本所道復有種種歌舞伎樂箏笛篳篥簫瑟鼓吹是樂音中復出是言苦哉苦哉世間虛空一一車前有善男子擎四寶案是諸案上有種種雜華及鬱金香及餘薰香微妙第一諸清信士女若老若少各各運心為天尊及徒衆辦諸食具種種備足皆是栴檀沉水香新八味之水之所成熟甘食甘美有六種味一苦二酥三甘四辛五鹹六淡復有三德一者輕軟二者淨潔三者如法作如是等種種莊嚴至元陽宮中以黃金徧敷其地繒絲衣物寶蓋以覆地上周徧一宮為天尊徒衆敷置七寶師子之座其座高大如玉京山是諸座上皆有寶帳垂諸瓔珞悉種種微妙幡蓋種種好香用塗其座復以種種名華以散座間諸清信士女各作是念一切衆生若有飲食衣服頭目肢體隨其所須悉皆給與作是施時離欲

瞋恚穢濁毒心无餘思願求世福樂唯志无
上清淨法戒是清信士女等皆以安住真人
之道復作是念天尊今者受我食已當向大
羅上界捨離我等作是念已身毛皆豎涕泣
盈目生大苦惱各各貴持供養之具載以寶
車香水幢幡寶蓋飲食並至尊所稽首尊足
以其所持供養之具供養天尊圍遶百而舉
聲號泣哀動天地淚下如雨復相謂言苦哉
仁者世間虛空便自舉身投天尊前而白尊
言唯願天尊大慈大悲哀憐我等受我等施
受我懺悔除我宿愆我等從无始世界百千
萬劫來至于今日凡經无量生凡經无量死
六慾枷鎖五陰纏縛貪愛悻悻惟知造罪不
識大乘今藉天尊大乘光明業力各自呵責
自觀已身如四毒蛇是身常為无量諸蟲之
所啖食是身臭穢貪欲獄縛是身可惡猶如
死狗是身不淨九孔常流是身如城血肉筋
骨皮裹其上手足以為却敵樓櫓目為察孔
頭為殿堂心王處中如是身城諸善真仙之
所棄捨凡夫愚人常所味著貪婬瞋恚愚癡

羅刹止住其中是不堅固猶如蘆葦伊蘭水
沫芭蕉之樹是身无常念念不住猶如電光
卑水幻炎亦如畫水隨畫隨合是身易壞猶
如河岸臨峻之樹是身不久當為狐狼鷓鴣
鷓鴣烏鵲餓狗之所食噉惟有智者當樂此
身寧以牛跡盛大海水不能具說是身无常
不淨臭穢寧久大地使如葉等漸漸轉小猶
草糜子乃至微塵不能具說是身過患是故
當捨如棄涕唾以是因緣諸人士女以空无
相无願之法常修其心深樂諸受大乘經典
聞已亦能為他演說護持本願毀譽是身甚
惡歎不堅牢心常修集如是正觀破壞生死
无際輪轉渴仰大乘既自充是復能充足餘
渴仰首深樂大乘守護大乘雖現是身實是
真仙等類善能隨世間度未度者解未解者
紹三寶種使不斷絕於未來世當轉法輪以
大莊嚴而自莊嚴堅持禁戒皆悉成就如是
功德於諸眾生大慈心平等无二如視一
子皆發是願伏願天尊受我供施容我懺悔
久住下界開度眾生授度經典得法益利莫

捨我等向於上界譬如父母未象成就忽捨
而去无所成就諸子孤劣貧窮失於覆蔭天
尊遠於上方捨我等去亦復如是伏願天尊
且住世間成就諸法覆蔭我等如此諸請鳴
咽頓悶大眾哀泣淚下盈目不能自止爾時
天尊從其面門出種種光明其光明曜大眾
大眾遇斯光已即知是事傳相告語天尊今
者現是瑞相不久必當反於上界所有供養
之具宜施天尊及於大眾松靈真人及大眾
等知天尊放是種種光明非无因緣松靈真
人等默然良久天尊告松靈真人汝等所奉
施天尊及大眾今正是時天尊正爾當欲還
上方第二第三亦復如是爾時松靈真人等
大眾聞此語已舉聲號哭悲咽而言苦哉苦
哉世間虛空復白大眾我等今者一切當共
五體投地同聲勸請天尊且住下界覆蔭我
等勿捨我去還於上方爾時天尊告松靈等
莫大啼哭自亂各當觀是身猶如芭蕉熟時
之災水泡幻化乳閻婆城坏器電光亦如畫
水臨死之囚熟果段肉如織碓上下當觀諸

行猶雜毒食有為之法多諸過患於是松靈真人復白天尊言專不久住於下界我等云何而不啼哭苦哉世間虛空唯願天尊哀愍我等及諸眾生久住於下方勿返於上界天尊告松靈真人汝今不應發如是哀憐我故久住於下方我以哀憐汝及一切是故今日欲還上界何以故諸尊法爾有為亦然

是故天尊而說偈言
有為之法 其性无常 生已不住 寂滅為樂
松靈真人汝今當觀一切行新諸法無我無常不住此身多有无量過患猶如水泡是故汝今不應啼泣爾時松靈復白天尊言如是如是誠如尊教雖知天尊方便示現欲還上方捨我等去我等不能不懷憂惱得自思惟復生慶悅天尊讚松靈善哉善哉能知天尊示同眾生方便去來諸法皆如幻相大聖在中以方便力无所染著何以故諸有教化隨方利益欲度脫眾生死老病苦悉皆當得不動果報常受安樂何以故我是眾生良福田故汝若復欲為諸眾生作福田者速辦所施

不宜久停爾時松靈為諸眾生得度脫故低頭飲淚而白天尊言善哉善哉我若堪任為福田時則能了知天尊還於上方及非還上方我等今者及諸真人仙人等猶如蚊蚋實不能量天尊還於上方及非還上方爾時松靈真人及其徒眾憂愁啼泣圍遶天尊燒香

散花盡心敬奉尋與眾真從座而去共辦食具松靈去後神州赤縣三界內外地震動一切眾生聞見知覺天尊還於上方是故此地大動時諸三界內外一切眾生聞是語已身毛皆豎同聲哀泣而說偈言

稽首調御師 我等今勸請 遠離於人仙
永无有救護 尊今還上方 我等沒苦海
悲戀懷憂惱 如憤失其母 貧窮无救護
猶如困病人 无醫隨自心 食所不應食
眾生煩惱病 常為諸見害 遠離法醫王
服食邪毒藥 是故大聖仙 不應見遺捨
如國無君主 人民皆飢饉 我等亦如是
失廢及法味 天尊還上方 我等心迷亂
如彼大地動 迷失於諸方 大仙向上界

我等於今日 云何不愁苦 天尊見救捨猶如棄涕唾 譬如日初出 光明甚輝炎 既能還自照 亦滅一切暗 天尊神通光 能除我苦惱 處在大眾中 譬如玉京山 天尊言譬如國王生育諸子心常愛念教以

仁義忠孝慈令通曉然後聽之不意諸子所習不善王乃棄之天尊告松靈曰我今為法教誨汝等已具正見願莫放捨如其放捨則同王子矣天尊譬如有人善學諸論復於此論而生怖畏天尊亦爾通達諸法而於諸法復生怖畏若使天尊久住於世說甘露味充足一切如是眾生則不復畏墮於地獄天尊譬如有人初學作務為官所收閉之囹圄有人問之汝受何事答言我今受大憂苦若其得脫則得安樂天尊亦爾為我等故修諸苦行我等今者猶未得免生死苦惱云何天尊得受安樂天尊譬如醫王善解方藥偏以秘方教授其子不教其餘外受學者天尊亦爾獨以甚深秘密之藏偏教老子遺棄我等不見顧憐天尊於法應无秘吝如彼醫王偏教

見顧憐天尊於法應无秘吝如彼醫王偏教

其子不教外來諸受學者彼醫所以不能苦
教情存勝負故有祕惜天尊之心終无勝負
何故如是不見教護唯願久住莫向上方天
尊譬如老少病苦之人捨速夷途而行險道
險道多難備受眾苦更有異人見而憐之即
便示以平坦好路天尊我亦如是所言少者
譬未增長法身之人所言老者譬重煩惱所
言病苦譬未脫生死所言險道譬二十五有
准願天尊示導我等甘露正道久住於世勿
速上方爾時天尊告諸法眾汝等莫如凡夫
諸天人等愁憂啼哭當勤精進繫心正念時
諸天人及大眾等聞天尊所說止不啼哭猶
如有人喪其愛子殯送已訖抑止不哭爾時
天尊為諸大眾說是偈言
汝等當開意 不應大愁苦 大道法皆爾
是故當嘿然 樂不放逸行 守心正憶念
遠離諸非法 自慰受歡樂
復次松靈等若有疑惑今皆當問若空不空
若常無常若苦不苦若依非依若去不去若
歸非歸若恒非恒若斷非斷若眾生非眾生

若有若无若實不實若真不真若滅不滅若
密不密若二不二如是等種種法中有所疑
者今應諮問我當隨順為汝斷之亦當為汝
先說甘露然後乃當還於上方諸大眾等天
尊出世歎人身難得值道生信是事亦難能
忍是亦復難成就禁戒具足无缺得无上道
果是事亦難如求金玉眾寶妙華亦難離於
八難得人身難汝等遇我不應空過我於往
昔種種苦行今得如是无上方便為汝等故
无量劫中捨身手足頭目髓腦是故汝等不
應放逸汝等大眾云何莊嚴正法寶城具足
種種功德珍寶戒定智慧以為塙塹汝今遇
是道法寶城不應取此虛偽之物譬如商主
過真寶城取諸瓦礫而便還家汝亦如是值
過寶城取虛偽物汝諸大眾勿以下心而生
知足汝等今者雖得出家於此大乘不生貪
慕汝諸大眾身雖得服黃褐染衣心猶未染
大乘淨法汝諸大眾雖行乞食經歷多處初
未曾求大乘法食汝諸大眾雖復大眾未為
正法除諸結縛汝諸大眾今當真實教勅汝

等我今見在大眾和合法性真實不倒是故
汝等應當精進攝心勇猛摧諸結縛十方慧
日既潛沒已汝等當為无明所覆諸法眾等
譬如大地諸山藥草為眾生用我法亦爾出
生妙善甘露法味而為眾生種種煩惱病之
良藥我今當令一切眾生及我諸子四部之
眾悉皆安住祕密藏中我亦復當安住是中
入於上方何等名為祕密之藏猶如三際去
來不斷何以故前際不去中際不住後際不
來來无所從去无所至上中下亦復如是上
不上中不中下不去不去住不住諸法如
是三法各異亦非向於上方汝等應如是觀
時到當還上方爾時諸法眾聞天尊定向上
方皆悉憂愁身毛為豎涕淚交流稽首尊足
繞无量而白天尊言天尊妙說无常苦空无
我天尊譬如一切眾生迹中鳥迹為上是无
常想亦復如是於諸想中最高第一若有精
勤修習之若能除一切欲界貪愛色无色愛
无明驕慢及无常想天尊大聖若離無常想
者今則不應向於上方若不離者云何說言

修无常想離三界愛无明驕慢及无常想天尊譬如農夫於秋月時深耕其地能除穢草是无常想亦復如是能除一切欲界貪愛色无色愛无明驕慢及无常想天尊譬如耕田秋耕為上如諸迹中鳥迹為勝於諸想中无常為最天尊譬如帝王知將升遐恩赦天下獄囚繫閉悉令得脫然後捨命天尊今者亦應如是度諸眾生一切无知无明繫閉皆令解脫然後向於上方我等今者皆未得度云何天尊便欲放捨向於上方天尊譬如有人為鬼所持遇良呪師以呪力故便得除差天尊亦爾為諸法眾除无明鬼令得安住大善福業譬如香鳥為人所縛雖有良師不能禁制須絕羈鎖自恣而去我未如是脫五十七煩惱繫縛云何天尊便欲放捨向於上方天尊如人病瘥值遇良醫所苦得除我亦如是多諸患苦邪冷熱病雖遇天尊病未除愈未得上安穩常樂云何天尊欲放捨向於上方天尊譬如醉人不自知不識親疎母女姊妹迷荒淫亂言語放逸卧不淨中時有良師

與藥令服服已即吐還自憶識心懷慙愧深自剋責酒為不善諸惡根本若能除斷則還眾罪天尊我亦如是往昔已來轉輪生死情色所醉貪嗜五欲非母母想非姊姊想非女女想於非眾生生眾思想是波輪轉受生死苦如彼醉人卧不淨中天尊今當施我法藥令我還吐煩惱惡酒而來未得醒寤之心云何天尊便欲放捨向於上方天尊譬如有人歎芭蕉樹以為堅實无有是處天尊眾生亦爾若歎我人眾生壽命養育知見作者受者是真寶者亦无是處我等如是修无我想天尊譬如聚澤无所復用是身亦爾无我无主天尊如七葉華无有香氣是身亦爾无我无主我等如是心常修習无我之想如尊所說一切諸法无我想汝諸法眾應當修習如是修已則除我慢離我慢已便向上方天尊譬如鳥迹空中現者无有是處有能修習无我想者而有諸見亦無是處爾時天尊讚諸法眾善哉善哉汝等善能修无我想時諸法眾即白天尊我等不但修无我想亦更修習其

餘諸想所謂苦想无常无我想天尊譬如人醉其心眩亂視諸山川城郭宮殿日月星辰皆悉迴轉天尊若有不修苦无常想无我等想如是之人不名為聖多諸放逸流轉生死天尊以是因緣我等善修如是諸想爾時天尊告諸大眾言諦聽諦聽汝向所引醉人譬者但知文字未達其義何等為義如彼醉人見上日月實非迴轉生迴轉想眾生亦爾為諸煩惱无明所覆生顛倒心我計无我常計无常淨計不淨樂計為苦以為煩惱之所羅故雖生此想不達其義如彼醉人於非轉處而生轉想我者即是道義常者是法身義樂者上方義淨者是法義汝等法眾云何而言有我我想者驕慢嘖嘖流轉生死汝等若我言亦修習无常苦无我等想是三種修无有實義我今當說勝三修法苦者計樂樂者計苦是顛倒法无常計常常計无常是顛倒法无我計我我計无我是顛倒法不淨計淨淨計不淨是顛倒法有如是等四顛倒法是人不知正修諸法汝諸法眾於苦法中而生樂想

於无常中而生常想於无我中而生我想於不淨中而生淨想世間亦有常樂我淨出世亦有常樂我淨世間法者有字无義出世間者有字有義何以故世間之法有四顛倒故不知義所以者何有想顛倒心倒見倒以三倒故世間之人樂中見苦常見无常我見无我淨見不淨是名顛倒以顛倒故世間知字而不知義何等為義无我者即生死我者即天尊无常者聲聞緣教常者天尊法身苦者一切外道樂者即是上方不淨者即有為法淨者諸天尊真人所有正法是名不顛倒以不倒故知字知義若欲遠離四顛倒者應知如是常樂我淨時諸法眾復白天尊言如天尊所說離四倒者則得了知常樂我淨天尊今者永无四倒則已了知常樂我淨若以了知常樂我淨何故不住一劫半劫教道我等今離四倒而見放捨欲向上方天尊若見顛倒念教勸我當至心頂受修習天尊若當向上方者我等云何與是毒身同共止住修於梵行我等亦當隨天尊向於上方爾時天尊告

諸法眾汝等不應作如是語我今所有无上正法悉以付囑老君是老君者當為汝等作大指歸猶如天尊為諸眾生作指歸處老君亦復如是當為汝等作指歸處譬如大三多所統領若遊巡時悉以國事付囑大臣天尊亦爾所有正法亦以付囑老君汝等當知先所修習无常苦想非是真實譬如春時有諸人等在大池浴乘船遊戲失琉璃寶珠沒深水中是時諸人悉共入水求覓是寶珠捉瓦石草木沙礫各自謂得琉璃珠歡喜持出乃知非真是時寶珠猶在水中以珠力故水皆澄清於是大眾乃見寶珠故在水下猶如仰觀虛空月形是時眾中有一智人以方便力安徐入水即便得珠汝等法眾不應如是修習无常苦無我想不淨想等以為實義如彼諸人各以瓦石草木沙礫而為寶珠汝等應當善學方便在處處常修我想常樂淨想復應當知先所修習四法相貌悉是顛倒欲得真實修諸想者如彼智人巧出寶珠所謂我想常樂淨想爾時諸法眾白天尊言如

天尊先說諸法无我汝當修學修學是已則離我想離我想者則離驕慢離驕慢者得向上方是義云何天尊告諸法眾善哉善哉汝今善能請問是義為自斷疑譬如國王暗鈍少智有一醫師性復頑暴而王不別厚賜俸祿療治眾病純以乳藥亦復不知病起根源雖知乳藥復不善解風冷熱病一切諸患悉殺服乳是王不別是醫知乳好醜善惡復有明醫曉八種術善療眾病知諸方藥從速方來是時舊醫不知諮受反生噴嘯輕慢之心彼時明醫即便依附請以為師諮受醫方秘與之法語舊醫言我今請仁以為師範唯願為我宣暢解說舊醫答言卿若能為我給使四十八年然後乃當教汝醫法時彼明醫即便受其教我當如是我當如是隨我所能當給走便是時舊醫即將客醫共入見王是時客醫即為王說種種醫方及餘伎藝大王當知應善分別此法如是可以治國此法如是可以療病爾時國王聞是語已方知舊醫藥暗无智即使驅逐令出國界然後倍復恭敬

客醫是時客醫作是念言欲教王者今正是時即語王言大王於我實愛念者當求一願王即答言從此右臂及餘身分隨意所求一切相與彼客醫言王雖許我一切身分然我不敢多有所求今所求者願王宣今一切國內從今已往不得復服舊醫乳藥所以者何是藥毒害多傷損故若故服者當斬其首斷乳藥已終無復有橫死之人常處安樂故求是願時王答言汝之所求蓋不足言尋為宣令一切國內允諸病人皆悉不聽以乳為藥若為藥者當斬其首爾時客醫和合眾藥謂辛苦鹹甜酸等味以療眾病无不得差其後不久王復得病即命是醫我今病因當云何治醫占王病應用乳藥尋白王言如王所患應當服乳我於先明所斷乳藥是非實語今若服者最能除病王今患熱正當服乳時王語醫汝今狂邪為熱病乎而言服乳能除此病汝先言毒今云何服欲欺我邪先醫所讚汝言是毒令我驅遣今復言好最能除病如汝所言我本舊醫定為勝汝是時客醫復語

王言王今不應作如是語如蟲食木有成字者此蟲不知是字非字智人見之終不唱言是蟲解字亦不驚惟大王當知舊醫亦爾不別諸病悉與乳藥如彼蟲道偶得成字是先舊醫不解乳藥好醜善惡時王問言云何不解毒醫答王是乳藥者亦是毒害亦是甘露云何是乳復名甘露若是乳牛不食酒糟滑草麥莖其積調善放牧之處不在高原亦不下濕飲以清水不令馳走不與犢牛同共一群飲食調適行住得所如是乳者能除諸病是則名為甘露妙藥除是乳已其餘一切皆名毒害爾時大王聞是語已讚言大醫善哉善哉我從今日始知乳藥善惡好醜即便服之病得除愈尋時宣令一切國內從今已往當服乳藥國人聞之皆生瞋恨咸相謂言大王今者為鬼所持為是狂邪而誑我等復令服乳一切人民皆懷瞋恨悉集王所王言汝等不應於我而生瞋恨如此乳藥服與不服悉是醫教非是我答爾時大王及諸人民踊躍歡喜倍共恭敬供養是醫一切病者皆服

乳藥病原闕

太上靈寶元陽妙經卷之十終